



Sud Bosne i Hercegovine
Суд Босне и Херцеговине

Broj: S1 3 Iž 037896 20 Iž
Sarajevo, 22.10.2020. godine

Sud Bosne i Hercegovine, u vijeću Apelacionog odijeljenja sastavljenom od sudija Vesne Trifunović, kao predsjednika vijeća, Srete Crnjaka i Dinke Bešlagić Čovrk, kao članova vijeća, odlučujući o žalbi Mihajlović Tihomira, Gradska 15, 31000 Užice, R Srbija, izjavljenoj protiv Odluke Centralne izborne komisije Bosne i Hercegovine broj: 05-1-07-1-998/20 od 01.10.2020. godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, u nejavnoj sjednici, održanoj dana 22.10.2020. godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine po podnesenim prijavama do 01.09.2020. godine, jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine. U odnosu na žalitelja odbijen je upis iz razloga što je isti registrovan na više različitih adresa.

Žalitelj je protiv navedene odluke blagovremeno izjavio žalbu u kojoj navodi da njegova prijava za glasanje van BiH putem pošte odbijena. Svoju adresu Gradska 15, 31000 Užice, R Srbija navodi u prilogu žalbe kao adresu sa koje želi da glasa. Da bi spriječio zloupotrebu svoji dokumenta dostavio je ovjerenu izjavu kojom potvrđuje tačnost svega navedenog u prijavi i email-u.

Centralna izborna komisija Bosne i Hercegovine u odgovoru na žalbu navodi da su za podnosioca žalbe dostavljene dvije prijave u kojima su navedene različite adrese na koje će biti upućen glasački materijal, te da žalitelj nije dostavio potvrdu nadležnog organa o prebivalištu/boravištu izvan BiH, zbog čega predlaže da se žalba odbije kao neosnovana.

Ispitujući pobijanu odluku u okviru žalbenih navoda, vijeće Apelacionog odjeljenja Suda Bosne i Hercegovine je zaključilo da žalba nije osnovana.

Iz stanja spisa proizlazi da je Centralna izborna komisija BiH prije donošenja pobijane odluke, utvrdila da su za navedeno lice dostavljene dvije (2) prijave na obrascu PRP-1-Prijava za glasanje izvan BiH, te su navedene različite adrese na koje će biti upućen glasački materijal. U konkretnom slučaju u prvoj prijavi je navedena adresa Birčaninova 9, 23261 Lukićevo, Zrenjenin, R Srbija, u drugoj prijavi adresa Gradska 15, 31000 Užice, R Srbija.

I po shvatanju apelacionog vijeća, druga dostavljena prijava žalitelja Mihajlović Tihomira se ne može smatrati obaviješću o promjeni podataka u smislu člana 3.16 stav 1. Izbornog zakona BiH, s obzirom da podnositelj žalbe podnošenjem druge prijave nije ukazao da ima saznanja o podnesenoj prvoj prijavi, kada bi se moglo cijeliti da druga podnesena prijava predstavlja promjenu podataka o boravištu u inostranstvu.

Tačna adresa stanovanja državljanina BiH koji privremeno živi u inostranstvu, ima biračko pravo i upisan je u Centralni birački spisak, predstavlja obavezni element prijave propisan članom 3.15 stav 1 Izbornog zakona (Sl. glasnik BiH br.23/01 sa izmjenama). Državljanin BiH je shodno članu 3.16. stav 1 citiranog zakona obavezan Centralnu izbornu komisiju BiH obavijestiti o promjeni podataka koje je predhodno dostavio, i to do isteka roka utvrđeno za podnošenje prijave za glasanje van BiH.

Kako podnositelj žalbe nije Centralnoj izbornoj komisiji BiH dostavio, u smislu člana 3.15 stav 1. i 7. Izbornog zakona BiH, potvrdu nadležnog organa o prebivalištu/boravištu izvan BiH kako bi se sa sigurnošću moglo zaključiti da je adresa na kojoj zahtjeva da bude registrovan prava adresa njegovog prebivališta/boravišta u inostranstvu, to i prema shvatanju apelacionog vijeća Centralna izborna komisija BiH nije bila u mogućnosti da utvrdi koja je od podnesenih prijava vjerodostojna. Tu činjenicu je dužan dokazati podnositelj prijave u smislu navedene odredbe Izbornog zakona BiH. S tim u vezi, pravilna je i zakonita odluka Centralne izborne komisije BiH, da navedenom licu odbije upis u izvod iz Centralnog biračkog spiska za glasanje izvan BiH.

Napomene radi, žalitelju nije oduzeto biračko pravo za Lokalne izbore 2020. godine, nego samo mogućnost glasanja putem pošte izvan BiH, jer isti može glasati na redovnom biračkom mjestu u općini u kojoj ima prijavljeno prebivalište u BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA
S U D I J A**

Vesna Trifunović